



Hordaland Fylkeskommune  
v/ Fylkestannlegen

Dykkar ref.:

Vår ref.:  
14/407 - 9 / JOO

Dato:  
20.01.2016

## Austrheim kommune - Merknad til klinikkstrukturplan 2015 - 2030

Austrheim kommune viser til Regionrådet i Nordhordland sin høringsuttale på klinikkstrukturplan 2012 – 2030 for den fylkeskommunale tannhelse og til vedtak gjort i Austrheim kommune knytt til nedlegginga av den fylkeskommunale tannklinikken på Austrheim.

Austrheim kommune meiner at den sterke sentraliseringa av offentlege tenester som skjer i dagens samfunn, ikkje gir innbyggjarane i distriktet dei tenestene dei har rett på. Den nye klinikkstrukturplanen for tannhelsetenesta i Hordaland, er i så måte ikkje noko unntak. Den råkar særleg barn, eldre og folk med fysiske eller psykiske plager. Det at mange pasientar må følgjast til tannlege, påfører både foreldre og det offentlege ekstra kostnader og utfordringar. Me har tidlegare bedt om at fylkeskommunen må setja brukarane av tannklinikane i sentrum, men me kan ikkje sjå at det vert gjort i den nye fylkesdelplanen for tannhelsetenesta.

Det har frå fylkestannlegen si side tidlegare vore hevda at ein i Austrheim kommune har dårlegare tannhelse enn elles i fylket. At svaret på ei slik utfordring skulle vera nedlegging av den lokale tannklinikken står for oss som ei fullstendig uforståeleg løysing på denne utfordringa. Det normale er at ein forsterkar innsatsen på områder der ein avdekkjer utfordringar, men fylkeskommunen valde den motsette løysinga, nemleg å gjera tannhelsetilbodet til innbyggjarane i Austrheim mindre tilgjengeleg.

Austrheim kommune prøver å leggja til rette for at folk i større grad skal kunna gå eller sykla til kommunale service- og tenestetilbod. Dette vert gjort både med tanke på folkehelse og miljø. Fylkeskommunen har også eit høgt ambisjonsnivå knytt til reduksjon av miljøskadelege utslepp, men også i forhold til dette spørsmålet må ein stilla spørsmål med den sentraliseringsiveren som enkelte avdelingar i fylkeskommunen viser. Leiinga i desse avdelingane kan ikkje vera kjent med eller ha forstått fylkeskommunen sin overordna miljøplan og miljømål.

Fylkeskommunen har ei svært viktig rolle som regional utviklingsaktør. Skal ein lukkast på dette området er det svært viktig at ein klarar å oppretthalda desentraliserte fylkeskommunale tenester på områder der dette er naturleg, som til dømes tannhelse og vidaregåande opplæring. Gjennom sentralisering av desse tenestene meiner me at fylkeskommunen sviktar si rolle som regional utviklingsaktør.

Fylkeskommunen har tidlegare hevda at det kan vera vanskeleg å rekruttera tannlegar til klinikkar i distriktet, men me kan ikkje sjå at dette kan vera tilfelle for Austrheim. Klinikken er sentralt plassert og kommunen har svært gode service- og fritidstilbod til sine innbyggjarar. Kommunen stiller også opp med kommunale bustadar til nye tannlegar i kommunen dersom det er trong for det.

Det kan hevdast at den faglege oppfølginga av tannlegar i distrikta kan bli mangelfull, men det bør ein kunna motverka dersom det vert oppretta ein hovudklinikk for Nordhordland i Helsehuset i Knarvik. Dersom ein fullt ut nyttiggjer seg dagens IKT-løysingar må det la seg gjera å gje tannlegane i dei desentraliserte klinikkane i Nordhordland ei tilfredstillande rettleiing frå denne hovudklinikken.

Austrheim kommune krev med dette at den fylkeskommunale tannklinikken på Austrheim vert opna opp att snarast. Denne klinikken ligg i kort gangavstand frå barnehage, barne- ungdoms- og vidaregåande skule, kommunale omsorgs- og pleieheimar og eit regionalt knutepunkt for kollektivtransport. Klinikken er slik utforma og ligg slik plassert at den kan gje arbeid til to tannlegar på fulltid. I ei tid der ein er opptatt av fråfallet i den vidaregåande skulen, er det viktig å merka seg at elevar som nyttar tannklinikken på Austrheim vil få minimalt med fråvær når dei har trong for tannpleie. Det er to vidaregåande skular i Nordhordland og fylkeskommunen bør ha som prinsipp at det skal vera fylkeskommunale tannklinikkar nærleiken av kvar fylkeskommunal vidaregåande skule.

Dersom fylkeskommunen ikkje vil starta opp att ein fylkeskommunal tannklinikk på Austrheim, ber me om at desse oppgåvene og midlane fylkeskommunen brukar for å løysa desse, vert overført til Austrheim kommune. Me har ansvaret for helsa til innbyggjarane i kommunen og føler oss fullt ut i stand til også å ta ansvaret for tannhelsa. Dersom ein innfører ei slik ordning over heile fylket kan ein oppretta ein tilsynsfunksjon for tannhelsetenesta hjå Fylkesmannen etter mal av ordninga med fylkeslege. Dette viser seg å vera ei ordning som fungerer godt og sikrar innbyggjarane gode og likeverdige tenester i heile fylket.

Vårt råd til fylkeskommunen i denne saka er at fylkeskommunen må setja brukarane i sentrum, tenkja miljø, folkehelse og fråfall og ta i bruk moderne teknologi for å hindra sentralisering.

Med helsing

Per Lerøy  
Ordførar

Jan Olav Osen  
rådmann

*Dette dokumentet er elektronisk godkjent og har difor ingen signatur*